

## Morning Dogri (NSD) National News Bulletin 08-10-2024

### आकाशवाणी

- जम्मू कश्मीर ते हरियाणा विधानसभा चुनावं दे दे वोटें दी गिनतरी अज्ज बडलै 8 बले शुरू होई गई ऐ।
- सीबीडीटी नै आयकर अधिनियम 1961 दी समीक्षा आस्तै आंतरिक समिति कायम कीती ऐ।
- केन्द्री सेहत मंत्री जे.पी.नड्डा होरें टी.बी रोगिएं लेई मता पोषण उपलब्ध करोआने आस्तै केई पैहल दी घोषण कीती।
- राष्ट्रपति द्रौपदी मुर्मू होर नमीं दिल्ली च 70में राष्ट्री फिल्म पुरस्कार समारोह पुरस्कार भेंट करगंन।
- आईसीसी महिला टी-20 विश्व कप अज्ज संजा शारजाह क्रिकेट स्टेडियम च आस्ट्रेलिया दा मकाबला न्यूजीलैंड कन्नै होग।

<><><><><><>

### India-Bangladesh

केन्द्रीय प्रतक्ख कर बोर्ड नै आयकर अधिनियम 1961 दी समीक्षा आस्तै आंतरिक समिति कायम कीती ऐ। वित्त मंत्रालय नै आखेआ जे इस समिति दा मकसद अधिनियम गी सरल, साफ ते संक्षिप्त बनाना ऐ। एह्दे कन्नै विवाद ते कनूनी मामले घट्ट होंगन ते कर दाताएं गी सौख होग। मंत्रालय नै सब्बने पक्खें, माहिरें ते आम लोकें कन्नै आयकर ई-फाइलिंग पोर्टल पर संज्ञाह मंगें न।

<><><><><><>

### Forest Right Workshop

पंचैती राज मंत्रालय ते जनजाति मामलें दे मंत्रालय नै किट्ठे रलियै "फारेस्ट राईट एक्ट यानि वन अधिकार अधिनियम ते पंचैत विस्तार गी निधारिम अधिनियम मामलें उप्पर दो रोजा राष्ट्री कार्यशाला अज्ज जबलपुर च शुरू करगंन।

दौनें मंत्रालय सांझे तौरा पर जनजाति समुदाय ते खास तौरा उप्पर जिला स्तरीय कमेटिएं, सब डिवीजन स्तरीय कमेटिएं ते चुने गेदे पंचैत दे नुमायंदे दे सदस्ये गी केन्द्रित क्षमता निर्माण ते सिखलाई लेई सैह्योग करा'रदे न। तकरीबन 21 राज्ये ते केन्द्र शासत प्रदेशे दे 150 राज्य ते जिला स्तर दे मास्टर ट्रेनरे गी इस कार्यशाला च प्रशिक्षित कीता जाग।

<><><><><><>

## Red Ponda

दार्जिलिंग दे पदमजा नायडू हिमालयन प्राणी उद्यान दे लाल पांडा कार्यक्रम गी वर्ल्ड एसोसिएशन ऑफ जू एंड Aquacians WAZA कंसरवेशन अवार्ड 2024 आस्तै फाइनलिस्ट दे तौर पर चुनेआ गेआ ऐ। इत्थे भारत सरकार ते बक्ख-बक्ख संस्थाएं दे सैह्योग कन्ने केई सारे कार्यक्रम संचालित कीते गे। ब'रे 2022 ते 2024 बश्कार 9 संरक्षित लाल पांडा पच्छम बंगाल दे सिगालिला राष्ट्रीय उद्यान च छोड़े गे। WAZA पुरस्कार दे जेतू दी घोषणा अगले म्हीने दी 7 तरीक गी आस्ट्रेलिया च 79में WAZA सालाना सम्मेलन च कीती जाग।

<><><><><><>

## Nadda-TB

केन्द्रीय सेहत मंत्री जे.पी.नड्डा होरे टी.बी रोगिएं ते उंदे संपर्क च ओने आले परोआर आले गी मता पोषण उपलब्ध करोआने आस्तै केई पैहल दी घोषणा कीती ऐ। मुख्य थमां टी.बी दी बमारी गी खत्म करने पर जोर पांदे होई नड्डा होरे आखेआ जे नि-क्षय पोषण योजना तैहत सारे टी.बी मरीजे आस्तै इलाज दरान मासिक पोषण सहायता, 5 सौ रपे थमां बधाइयै इक ज्हार रपे कीती गेई ऐ। उनें आखेआ जे सरकार नै 18.5 थमां घट्ट बीएम आले सारे क्षय रोगिएं गी पूरक पोषण देने दा बी फैसला कीता ऐ। नड्डा होरे आखेआ जे सरकार नै मरीजे दे परोआरे दे सदस्ये गी शामिल करने आस्तै प्रधानमंत्री टी.बी मुक्त भारत अभियान तैहत नि-क्षय मित्र पैहल दा दायरा बधाने दा बी फैसला कीता ऐ। नि-क्षय पोषण योजना तैहत हुन 5 ज्हार रपे थमां 6 ज्हार रपे तगर दी पोषण सहायता थ्होग। एहदे कन्ने हर ब'रे 25 लक्ख क्षय रोगिएं गी लाह होग ते पूरक पोषण योजना कन्ने लगभग 12 लक्ख घट्ट वनज आले मरीजे गी लाह होग।

पूरक पोषण योजना पर बाद्धू इक जहार 40 करोड़ रपे खर्च होंगन। एहदा 60 फीसद केन्द्र सरकार ते 40 फीसद राज्य सरकार देग। सेहत मंत्री होरें दस्सेआ जे नि-क्ष्य पोषण योजना तैहत हुन तगर 13 लक्ख लाभार्थिं गी प्रतक्ख लाह तैहत 3 जहार 202 करोड़ रपे दित्ते जांगन।

<><><><><><>

## National Film

राश्ट्रपति द्रौपदी मुर्मू होर अज्ज नमीं दिल्ली च 70में राश्ट्रीय फिल्म पुरस्कार भेंट करगंन। एह पुरस्कार बरे 2022 आस्तै दित्ते जांगन। इस मौके पर मन्ने परमन्ने दे अभिनेता मिथुन चक्रवर्ती होरें गी सिनेमा क्षेत्र दे सब्बने थमां बड्डे सम्मान दादा साहब फाल्के पुरस्कार कन्नै सम्मानित कीता जाग। ऋषभ शेट्टी होरें गी उंदी कन्नड़ फिल्म आस्तै सर्वक्षेष्ट अभिनेता, सर्वक्षेष्ट अभिनेत्री दा पुरस्कार तमिल फिल्म अभिनेत्री Withys Menen गी ते गुजराती फिल्म Kutch Express लेई मनासी पारेख गी दित्ता जाग। एहदे इलावा फिल्में के.जी.एफ-2, ब्रह्मअस्त्र ते अपरजित्तो गी बी उंदे योगदान लेई सम्मसनित कीता जाग। अरीजीत सिंह गी सर्वक्षेष्ट गायक ते बाम्बे जयश्री गी सर्वक्षेष्ट गायका दा पुरस्कार दित्ता जाग।

<><><><><><>

## President-VP

राश्ट्रपति द्रौपदी मुर्मू ते उपराश्ट्रपति जगदीप धनखड़ होरें कल नमीं दिल्ली च मालद्वीप दे राश्ट्रपति डॉ. मोहम्मद मुइजू हुंदे कन्नै मलाटी कीती। राश्ट्रपति होरें उंदे सम्मान च रूट्टी दा आयोजन कीता। दौनें नेताएं भारत ते मालद्वीप दे दपक्खी सरबंधें दी समीक्षा कीती ते इसी होर मता मजबूत करने दी प्रतिबन्धता दोहराई। राश्ट्रपति मुर्मू होरें आखेआ जे भारत दी गोआंढी पैहले ते बिजन सागर नीतिं तैहत मालद्वीप इक महत्वपूर्ण सांझेदार ऐ। उपराश्ट्रपति जगदीप धनखड़ हुंदे कन्नै बैठक दरान मुइजू होरें आखेआ जे बिजन दस्तावेज दौनें मुख्खें बश्कार सरबंध मजबूत करने दा माध्यम बनोग।

<><><><><><>

## Arctic Open 2024

बैडमिंटन दा The Arctic Open 2024 अज्ज फिनलैंड दे वंटा च शुरू होने आला ऐ। 6 दिनें चलने आला एह आयोजन इस म्हीने दी 13 तरीक गी समाप्त होई जाग। भारत दे स्टार खडारी पी.वी.सिंधु ते लक्ष्य सेन पैरिस ओलंपिक्स दे परेंत पैहली बारी इस आयोजन च खेड्डगंन। पी.वी.सिंधु हुंदा अपने नमें कोच अनूप श्रीधर ते कोरियन लैजेंट ली सूआन कन्नै पैहला आयोजन होग। शटलर किदाम्बी श्रीकांत होर बी भारती 12 मिंबरे दे स्काड दा हिस्सा होंगन। Arctic Open 2024 दा सिद्दा लाइव प्रसारण तुस बैडमिंटन वर्ल्ड फ़ेडरेशन दे अधिकारिक यूट्यूब चैनल बीडब्लूएफ टीवी उप्पर दिक्खी सकदे ओ।

<><><><><><>

## Women T-20 World Cup

आईसीसी महिला टी-20 विश्वकप च अज्ज संजा शारजाह क्रिकेट स्टेडियम च आस्ट्रेलिया दा मकाबला न्यूजीलैंड कन्नै होग। एह मैच भारती समें मताबक संजा साढ़े 7 बजे शुरू होग। दौनें टीमें इस विश्व कप प्रतियोगिता दे अपने पैहले मैच च जित्त हासल करी लैती दी ऐ। कल होए दे मैच च इंग्लैंड नै दक्खन अफ्रीका गी 7एं विकटें कन्नै हराई दित्ता हा। दक्खन अफ्रीका नै 20एं ओवरें च 124 रंज बना। कप्तान लौरा वॉल्वडर्ट नै सारें कोला मते 42 रंज बनाए।

<><><><><><>

## India-Bangladesh

मर्दे दे टी-20 क्रिकेट मैच च भारत कल बंगलादेश कन्नै दूआ टी-20 मैच नमीं दिल्ली दे अरुण जेटली स्टेडियम च खेड्डोग। मैच संजा साढ़े 7 बजे शुरू होग। सूर्य कुमार यादव भारतीय टीम दी अगुवाई करा'रदे न ते 3 मैचें दी इस श्रृंखला च 1-0 दी बढ़त कन्नै अगो न। कल दा मैच बंगलादेश आस्तै करो जां मरो आली स्थिति आला ऐ। पैहले मैच च भारत नै बंगलादेश उप्पर 7 विकटें कन्नै जित्त हासल कीती ही। भारती गेंदबाज अर्षदीप ते वरुण चक्रवर्ती अपनी शैल फार्म च न ते इनें दौनें पैहले मैच चदौनें 3-3 विकटां हासल कीतियां हियां।

<><><><><><>

Joshi

नमीं ते अक्षय ऊर्जा सरबंधी केन्द्री मंत्री प्रहलाद जोशी होरें आखेआ ऐ जे भारत दा लक्ष्य 2030 जगर पैहले 10 जहाज निर्माता मुल्खें ते 2047 तगर पैहले 5 मुल्खें दी सूचि च शामिल होने दा ऐ। जर्मनी च हैम्बर्ग सतत विकास सम्मेलन च अपने संबोधन दरान जोशी होरें भारत च हरित पोत परिवहन ते ऊर्जा क्षेत्र च होआ'रदे बदलाव पर लोह पाई। उनें आखेआ जे 2014 मगरा भारत नै अपनी अक्षय ऊर्जा क्षमता च परिवर्तनकारी बाद्धा दिखेआ ऐ जेहड़ा 75 गीगावाट थमां 175 फीसद बाद्धे कन्नै हुन 208 गीगावाट थमां मती होई गई ऐ। जोशी होरें इस गल्ला पर बी जोर दित्ता जे सौर ऊर्जा दे राएं जलवायु बदलाव कन्नै निबडने दे वैश्विक जतनें च 100 थमां मते मुल्खें आस्सेआ समर्थित अंतर्राष्ट्रीय सौर गठबंधन भारत दी अगुवाई गी प्रदर्शित करदा ऐ।

<><><><><><>

WHO

विश्व सेहत संगठन डब्ल्यूएचओ नै सेहत कार्यबल शिक्षा क्षमता, आपूर्ति ते भंग दा आकलन करने च अफ्रीका दी सहायता आस्तै सेहत श्रम बजार विश्लेषण उपकरणों दी शुरूआत कीती ऐ। एह उपकरण श्रम बजार कवश्लेषण च सेहत कार्यक्रम योजना दे एकीकरण दी सुविधा आस्तै तैआर कीता गेआ ऐ। डब्ल्यूएचओ नै ब'रे 2021 च सेहत श्रम बजार विश्लेषण गाइडबुक विकसित कीती ह'ते अफ्रीका दे 25 मुल्खें दे 75 माहिरें गी सिखलाई दितती ही।

<><><><><><>